

玉茗堂全集

玉茗堂全集

臨川義仍湯顯祖著

碑

蘇公着源新成文昌橋碑

郡東出數十武絕汝水而梁中于信盱連于淦
章冠蓋郵驛之使無虛日率以東行爲良橋宜
廣以紆而居人旅子肩摩踵錯其亟於斯也固

晝夜然矣橋之以石也宋嘉泰始也橋之名文昌也宋寶慶始也而唐李柏倅虔甫記乃云汝江趨文昌橋非橋也堰也入元兵燹相仍橋政無所攷至嘉靖間守陸公堂與令林公恕卷石易木則其先標也六十年而金隄復水以全力注橋橋敗將趙州學所記橋隄足兩存者非耶後視敗卷乃有土其中水入而驟宜矣守張公

試輒募民毀故壑而加大者四數年而丞晉江
朱公于讚署郡檄驛丞孫耀祖募修其餘仍櫟
爲梁成且三年矣而倏以燼公私咸病焉春夏
間水暴下橋敗石犬牙立破船而漂流卒不可
救者歲常百十人號哭聲被岸而莫敢以告以
告莫爲緩急者費也天以蘇公惠民至而顧視
其址曰此豈不可更爲耶視帑帑虛募民民劬

吾有以處此矣夫民上所使也聞之用地者以
利用天者以時而用人者以和不和而強使之
千萬人不能用也和而使一人焉可也和莫若
以道公清微虛遠以道正其體顯允疎越以道
弘其用與物無營而與民有經所治官屬大夫
士下至閭井匹夫匹婦之微與同憂樂急人之
善而寬其過得可而止其容蒼然其中穆然未

期而士民安之豁如也滌疵導休善氣條遂公所起意莫肯用戾於是耆稚士女皆知公有意乎成梁而未知所承也有馬之婆婦人持其半歲孤兒來訴曰是兒家累千金欲得者衆懼無以寘此子公喜而領曰役其濟矣令婦人出而意示其宗老曰財散則孤兒安以爲梁誰爭彼者乎宗老以語婆婦人婆婦人曰謹如命公起

日信哉必若所爲府不汝與也立爲徵匠于開
化新安所嘗治金隄者以來而擇三月良日首
事以聞監司莫不允悅而公乃始進耆老百姓
而教之曰若知爲橋所以固乎宋守王君謙始
爲石梁而屋之平以板火漏其隙江風扇之不
可向樸昨之火猶是也慎無櫟與板而以石上
下之縮水門之一而增高焉甕之無以土成無

以邸閣雖厲焚火無益也中爲亭以休而繚其
闌以馮若是則水火之卒至而風雨之無時其
將免乎皆曰謹如命于是精耆指麾信老度支
官爲役以示其婺伐石冶鉄排槎鍛灰平備善
佑謹往躍來蓋十月而水門具逾年而石道平
何其快也官無董稽民無勸追何其佚也橋成
而居者連連行者翩翩又何適也高雄敞鮮旁

無蔽虧南望石門金隄北望鍾陵劍墟溶溶蔥
蔥開煙翕霞臺城參差豐茸萬家亦何壯也長
雲亘施潛颺折躑永無害菑又何固也一時騷
舞道幸以爲天地人合發於茲不知我公所以
執天機立地符起人心者盖有道焉道至而功
成而公不言功郡士民與家封君謀所以言者
以命予小子謹爲記而永之以銘銘曰星上山

川旁魄精氣形上曰道形下曰器道以成物器
以濟世濟世惟梁上直文昌何彼祝融延于戴
筐傾何耿紆孰爲其扛其扛有神除舊布新帝
降不遲我公天人恭儉惟德清明在身滌蕩苛
疑毓衍純真上義下順流歡去愠不肅而成不
言而訓匹婦之微亦效其信遂梁河關丁丁屏
屏精衛填河孀子移山漸履其安壯觀以還累

石駢甕瓏玲空洞委若黿鼉舒如蟠踈廻瀾束
湍堅立不動高視遠陟如睨道陌交龍東南狡
倪西北金石皎炯佳氣四塞佳氣維何得道者
多道以政通政以人和如坻如岡如切如磨旁
關以備中亭以憇百世之營期月而濟公不言
功歸之天地公功不忘川流詎央端明惠州宣
父寶唐惠我來蘇繼繼皇皇曰千萬年公在文

昌

東莞縣晉黃孝子特祠碑

今上辛卯夏余以言事尉海北冬道南海過哭
再從父墓東莞焉撫友人和衍曾之孤遂如羅
浮而諸生陳君啟心者乃以書來爲其先賢晉
孝子黃公舒特祠欲有以記也然孝子生處其
地乃割在新安界中孝子晉人也家貧自力養

文

八卷 六

侍雖盛暑未嘗不冠帶親意所在千里之外不以爲難親死皆身爲墳而廬深野中無人猛獸左右嗥安之也每夜定或寒月號哭聲常飄蕭出林薄隨悲風遠聞人爲泣下獨日飲一杯糜形色枯槁人勸其還哭而不答行路之人皆曰黃舒今之曾參也有司表旌其居曰參里里有山岑蔚可愛爲參山有孝著聞如此至於今且

千年矣學宮闕焉不祀何也而諸生中若李元表祁衍曾陳啟心此三人讀書而豪以言於縣令樂安董君董慨然曰此嶺表人士之初也曲江諸賢猶在其後而郡以上學使者莫不歎動焉然有以新安疑者董君曰入新安界者今爲堯人者昔也乃擇日附主學宮亦十有餘年矣妄一人來視縣事竟議祀之新安而主在東堯

學宮者遂置屏處是時祁生病且歿李生一人
不能爭而陳生目又廢然獨發憤抱其主以出
且言曰仁人孝子天下一家東筦新安故非兩
邑也今已罷祀主無所歸生等願不煩費縣官
一人一緡錢但得城北空地七丈餘足以容
主令東筦之人有父母者得望見焉觀學者許
之三年而後克成多里中贖豪長者營之陳生

首義嗟夫陳生有其心無其目矣猶感憤好德
千載之前舉義如是况夫有心有目者哉而是
時東莞伯何真之祠亦成真於元喪亂時有粵
地十七歸高祖贐於尉佗遠矣讀其書不使
人感恟而嗟嗟孝子無尺土之柄獨身事一父
母又非有奇孝其孝閭野人所得爲也至今人
人讀不能半其傳卽涕歎結塞皆願如黃孝子

事其親願有子皆如黃孝子固未有願如東莞伯者也豈非雄力智數之事於人心必有所疑然而接神明感天性乃在於其根本至德也與詩云天生烝民好是懿德言此烝民是天生而然孝德者所以不忘其生故烝民感動尤至歲月之所不能泯地界之所不能分在禮有其舉之莫敢廢也言凡非不得祀者也況如孝子者

哉詩云孝子不匱永錫爾類莞之人得而觀焉
庶亦有類于孝子者乎余嘉陳生諸人所爲好
德必行其意者也而銘之以告莞之人銘曰粵
於西晉荒落蒙靡不知父母乃有孝子生死至
性愛而有禮哭不能言心孝而已縣縣嶠士孝
子伊始鄉可以祀豈有分里爲主特廟厥義良
偉有門有堂有寢孔構闢門在左石梁在右江

水在前睥睨在後稍有形勝儼雅宵峭汝莞之
人誰無父母有孝以教誰爲來者亦有人子來
吏斯土惟孝以忠神明是與遙遙參山氣鬱且
明其類維何樓觀蒼蒼冠帶愴泱蠻夷有風我
愛爲銘以感人心

惠州府興寧縣重建尊經閣碑

天下珠碧孔翠香澤奇絕之玩寒之不可以衣

饑之不可以食萬里而走五嶺之南毒蛇飛蠱
藺良百有一死之地務取多而爭美以耀其軀
顏充其室御而桓與夸給上都中縣之人以爲
是能得所不易致者至于六經先王聖師所爲
飲食被服天下入于性命形色之微出乎文理
事業之大積之若尺椀而用之不可旣陳之若
九鼎而其用日新此其相珠翠奇麗也不亦急

乎又非有遠萬里險絕漳螫之虞安坐而致各
可以相得而無容以夸者然過之而不取取之
而不能以多畧其粗而不爭其美者何也且彼
之取焉者有禁取六經者非惟莫之禁耳苟有
意乎爲人上者將歌然而與之惟恐不家箚而
人誦焉何也法不勝道道勝而風移吾亦可以
簡法而治也然予觀下之能取于六經者鮮矣

雖上之人持六經以予人者亦未能往往而是
教衰道微上之人亦猶夫卑古尊今之爲見爾
予友金鹽中臺史侯殆有意乎爲人上者嶺之
東有惠惠之東有興寧而侯在焉侯爲人偉好
頎秀而髯望之知其神君也行嚴而貞衷理以
平民有弗若矜哀之不忍以刑鏗鉉嘔响反復
再四而民於是乎始知法矣侯曰是未可以及

化子云入其國見其人其經教可知也吾興寧
之人性潔敬與情廣厚與能知類而屬詞與入
吾境觀吾人吾殆未嘗以經教矣夫士以式民
而經以式士於是博士王君學淵連君瓚帥羣
弟子而進曰世有積而必披道無洩而不澄惟
惠靈山鬱州衣冠之氣被于興寧大望其恢九
連遂清父老子弟不見兵革者殆且百年于茲

生齒繁遂庶而教之亦繼其時士專一經束于
功令未能旁暢方以不獲人師遠于固陋是懼
而侯身以明教爲我人師其不終鄙夷之乎侯
笑而謝之於是簡賦薄稽休暇有餘時從博士
諸生橫經各授以先王聖師所以豐給美好吾
人之意問焉以言如發崇山如脉波流士皆鼓
舞沉詣如嘆于志然後知侯之大有得于經而

邑之大有得于侯也侯曰未也當爲汝士廣置
經籍不可以無地起而循學之北爰有弟子焉
是可以營而尊吾經因以益飾其學宮墀廡門
得請于上而眎其廣深度其几楹不煩而庀不
張而翬不亟而成成之日侯與學官弟子喜而
落之觀厥美富精志踴悅乃度乃儲亦籍在中
經以聖典緯以賢謨肴以史志稗以百家菱蕪

選醇惟經是尊侯喟然曰以是爲尊之已乎尊
天者用其日月風霆而後曰仁尊父母者用其
聲色意氣而後曰孝尊生者用其饑渴寒暖之
時而後曰知經于人如天如父母如生尊而用
之性命形色之微文章事業之大皆取乎是不
然度閭之鑄管之擇日而蠹焉有啟閔者焉以
辨以文弗躬弗視此又以六經爲孔翠珠碧之

玩者也非吾則貴于尊焉者博士弟子拜手曰
侯之言大不可以無傳千里而謁予以記予固
知侯之所以經政非其邑而止也蓋侯之鄉人
祝公允明常令于茲記其邑之水利而靡害且
曰予旣美水功傷其局於斯域而弗普又傷夫
人之弗克用水者若以自况云予亦美其言而
未大也若夫六經之在天下如水之在地中局

於其域未嘗屈於其域也雖夫人弗克用之亦
未嘗不爲其人用也况夫上之人脉脉然醺醺
然教人用之而有弗克用者與昔之祝公能用
水今之史侯能用經異日以經術用天下自興
寧始不亦偉與記而系之詩天作高山寧昌是
壤劃然中開沃野夷原雄雄學宮附麗而遷如
寢斯鉤鼓角在前東有雞靈寶山燭天神光貴

人鳳翔其西屬海于河或委或源毗于六經光
響亘延剖山觀河恣取而捐實初寔儲宜抗而
宜面勢其陰龍淵則蟠我經秩秩我閣憲憲月
口斯成登降歡欣圖書若星衿帶如雲從侯流
觀樂侯笑言道高且明莫敢不尊廣侯德心不
朽斯文我言是徵以訊其人

遂昌新作土城碑

遂昌爲括蒼郡西南邑治萬山溪壑中介長松
龍泉猶毗境也西北而南交衢嚴婺鄞犬牙信
州以捷于閩絲邇與絕緩急猝不可檄制地少
田畜而豐于材其芟蔕新桴則旁郡之流傭也
多隱民焉而鄉若邑長老子弟無賴者常蔽其
奸與爲利盜以故出沒不可迹夜輒者復多虎
憂而境旁數礦近詔止采盜亦時時有之余昔

治此故未有城橫亘一街可步而竟居人悉南
其溪而闌以一橋門可闔而入也念城之帑無
見儲不可刑政者吾城耶乃稍用嚴理課殺虎
十七而勒殺盜酋長十數人縣稍以震因循四
五年乃幸無事然意未嘗不在城也余去治一
年而遂有殺人于市橫橋門而去者民脅息以
譁歷三政得晉安羣公以名德淵雅來靖茲邑

秉素絲之心持六車之體當其操軌介然雖極
勢力機利之衆不能奪也一意約損與民俸薪
時以治客衣食無所餘至不能遺子嫁女訟明
而寬清惠聲有聞千里之外民習教令盜日以
遠而公亦且上三年計最矣尤惠顧其民曰縣
如是其亦舉無隨弗與獨如城何吾不能爲千
仞石城而土城數仞之其可乎請于上而謀于

下必躬必親引溪度山畫圻而程物力有宜脩
餘有經以賦弓司以屬其耆神告威庶不可以
疑築踴絙趨橐鼓弗渝邪許句婁襍民懽謳大
姓居間欣焉自完屬間填埤工倍于官察所不
任官直其難以楨以茨民乃不煩蓋數百丈之
城數十日之間而公與士民休然晏請具文書
報成事矣士民擇吉釁謳歌舞用塞司隍之貺

而懽呼稽首爲公謝曰保障有邑以來未始有也公始從官屬民履其孺莫不仰天嘆曰茲役也不櫬巢而薊不睨睨而遠不髹粉而華不闔拒而固蓋我公之時也公嗛然俯首而謝曰良以藩吾坊之人安寢無恥謹司之而已邑近寶而囂幸國家無事異時虞盜兵之來邑之君子阻溪而陴或跨溪而城未可知也語不云乎推

輪爲大路之始累石委土庶幾自吾始乎雖然
昔人北志金湯志而偷三里城猶折樊也邑雖
小其無四維腹心于城汝士民所以自衛也吾
行矣已而監撫使者上公治行求卽丞括蒼終
其勤績不報而且以知瓊管萬州事士民愈用
謳思以城予志也千里而來告成且求鑑予所
不能爲士民庇依者公能爲之其又何敢以

銘曰天於平昌險不可升繚以地形山川丘陵
維城弗咨缺其威懷旁邑逋連伏奔攸興蒐慝
討亡懜莫勝懲我公來治惠和清澄士民安歌
不叱不騰寬而盜還有德者能公曰其然維城
是應君子之堂叢山爲肱引梁爲喉帶溪爲膺
隙隧如夷出沒我乘溥城寔難連壙具勝乃十
乃管子來烝烝其氣溶溶其聲藹藹循淮逶迤

裏山峻嶒垠疏者新碕堅則仍爾絕爾聯爾埤
爾增隱以冲冲削削焉焉其橫霓馳其矗雲昇
自公指麾材宣力凝和會陽陰作中梁繩以裕
而升有遠而恒橋扉汲門偵管是兢士女朝迫
以沐以蒸牛羊夕歸靡夷靡崩甘寢露藏庶無
盜憎赤烏以來百雉斯稱業以時臻道在人弘
育世之仁我公是徵醴酒麗牲神休所凭我

公功于亘于登戒邑于隍以莫不承

麗水縣修築通濟堰碑

經立世業之謂才遘會世機之謂時引天地之
力極五行之用開塞利害滅益盈涸早算旁拮
時察穎斷非才莫可以爲也雖然獨智不與以
慮獨勇不與以成視其氣萎於結齋詭譎峭疾
此其時雖有訓事其亦可以已矣若夫時敘端

好上下和茂山川精朗若發其覆雅頌流委士
女遊豫煥若新洗耆長喜壽癢滯思起有時若
此而爲其長上若有事焉若開若塞若減若益
揚摧指顧皆有華澤官師吏事手語心諾則何
慮而不發何斷而不成天下國家之事機有向
悖業有王廢蓋莫不因乎其時者予嘗試爲長
吏於浙之處遂冒也而感于麗陽十數年之前

何如時也所謂其事無不可以已者耶今何時也鄭公爲郡而樊君爲長蓋予以遂昌謁郡而道松遂之水源高急砂礫不可以舟松而後可以舟也通濟堰在麗水西界中其埃有龍祠可以陰堰源一斷之爲三所溉田百里最爲饒遠而並隄居昨常盜決自喜米鹽之舟水涸硤磧如縷常曲拆徙泄而後乃可行堰歲積以非固

比益以水敗而並堰以下若司馬章田寺逕于河東亦皆以蕪廢不治寶定之呂碧湖之湯父老以聞于予未嘗不嘆息而去欲爲一言其長會歲少旱而麗饑松閉之糴麗人譁受事者幾以雨敗予嘆曰水事不修而旱是譟者何也去十年而麗人來問其堰曰畢修矣夏之六月我樊侯始用祭告有事于通濟堰七月暨其旁下

諸堰盡于白橋皆以十二月成諸堰之費千而
通濟裁倍旱期之勤數世之食也曰何如矣曰
先是春正月龍祠傾野火燒其門如將風雨者
有蛇龜焉象輿廻翔其上而火已居人請新之
我侯來觀而周徇于堰悼其徙以陔問其故則
與所以敝者次第起行諸壞堰各從父老所問
所爲修復費心計而首領之以上太守鄭公公

槩然曰坊敗而水費則移而水私固賢長吏事也其以上司道車公公報可而侯乃始下令齊衆均力與財侯常以其俸入身先後之民所願平準所度田自爲浚葺者聽大小鼓舞集而後起序而後作築崖置斗疏函室穴開拓諸槩縱廣支擘視故所宜遊枋旻石易其朽泐謹察匠石分寸畫一啟閉隨驗高下不失是役也贊

約而功溢侯乃以西人擇日上成事受慶報賽
伐鼓絕瑟有土有年上下無患是謂永逸予憮
然嘆曰侯之才斂至是耶麗人曰非若是而已
歲嘗旱侯從鄭公禮於麗陽之山畢吁而雨乃
新學宮從鄭公講五經于堂芝草生數十年而
弟子之舉于鄉者三人上春官者一人侯之才
蓋通天地而幹五行非水事而已也予嘆曰而

亦知麗之有侯樂乎昔麗之人踏履督視今麗
之人飛色吐氣則吾見麗之今日矣鄭公樊侯
皆有春秋僑盼魯公宓子之意簿書不以勝委
迺叱咤不以移色笑士民休居貌若有餘工其
樂膏汝公汝侯道達謳于醴潤郁鬱精鬯發越
流止土石氣莫底闕聚人而人理疏川而川治
此亦汝麗人千祀之一時也其又何有于數十

里之水坊開會爲麗人喜而拜曰今而後知所以樂有吾麗也將銘侯功于龍之祠莫可爲者予宜爲銘銘曰麗陽阻山磽陁其畝仰雨無時迄東有衍絕潭而西百里爲沃醴水以彼壅湖以屬事始惟梁司馬詹南宋令日禊乃作石函越守成大申著水則源極中下槩衡南北股引三百派餘七十我匱我斗以注以挹及圯而新

必智與仁水有旁淪土亦善湮有龍自天祠于
侯左旣貞其旱亦戒于火侯雩于川膏雨其隨
來視其祠亦民是爲起行諸堰或屬或散都十
有一畝二其萬彼決弗苴彼偷弗治如水斯平
不平以私石久則裂枋久則腐歲比少有曷爲
其故侯旣念止計嚮尺寸下與其勤上然其信
涓辰用書分耆屬傭鼓役無羸登輪靡窮親以

節口二屬有帥迄用告成九十維日代有廢興
莫必其理侯用大作濶長脉理雲雨版甬晝夜
畧刻沃彼靈翠施于岑擇維侯有材亦孔其時
太守伊人如友如師雅頌流通山牖依融晏盟
維期蜿蜒效工肅新龍祠亦祀司馬紀侯于碑
歌舞其下終古稻梁好樂無荒終侯之功以配
麗陽

送吳侯本如內徵歸宴世儀堂碑

吳本如先生在吾臨六年政成徵爲戶曹尙書
郎以去父老子弟思所以留之不可得祠之先
生行有日矣謂予曰予且欲如世儀堂六年之
勛息以累月一行受事長安中猝未能家食也
因言世儀堂可以庥風雨納景光栖文尊酌燕
言主人回翔其間車馬之驚塵簿書之零碎不

足易吾樂也予問世儀其何以儀先生曰予諸
生時有堂也樹而雉止其棟雉文禽也以爲瑞
而顏之已而獲從太學中連第以去若此其祥
也得仕于臨而再上計冬過家更堂其東匠者
方施礎刻柱而一雉復翩翩從天而下入于懷
中雉上不踰丈有咫何其高而有儀也其又祥
予而徵也乎且予先大夫儀亭先君來儀雖不

光乎時而皆有隱德堂之以世儀名亦以志吾
思也予瞿然起而嘆曰有是哉江淮以南翬青
地而備文耿介而聞微質青仁也耿介義也聽
察先聞智也五章禮也有此四德者可爲世儀
夫鳳凰者天子之禽也故虞書劄韶九成鳳凰
來儀鴻鴈雖卿大夫之禽在易漸上九曰其羽
可用爲儀則隱士也惟雉也天子可以袞而士

可以摯天子可以袞則天子之儀也士可以摯
則士君子之儀也可以爲天子儀則上行而可
以毗于鳳也可以爲士君子儀則平施而可以
列于鴻也爲世之儀不亦遠乎且先生世有隱
德至先生而光加以有功德于臨然則茲堂之
爲先生儀且瑞也其又可以世次數乎予喜從
父老子弟後而歌斯堂也歌曰大江以南大吳

自東有臺于縱有國于桐我侯之美世濟斯豐
含章以秀食德而融起于諸生一畝之官益堂
其西有棟而隆乃瑞自天我雝其容一止于梁
再集于躬齊新厥寢應以鳴鐘侯堂維何圖書
在中匪猗匪遊何起何從以摯而升若彼桓躬
衮職有補以兆華蟲離而亦潛鷺矣其嚶君子
儀之濟于雲鴻我侯于臨人和政通言歸京師

于焉雍容侯宴于堂載考其祥文明以止聾飛
則翔有羆有熊爲龍爲光君子儀之以世其堂
渝水明府夢澤張侯去思碑

歲壬寅夏臨江新渝縣侯晉陵張夢澤先生視
縣且中秩而忽以先大夫之訃行其邑之士民
以千數無不星舛雨泣如失慈乳不可避留送
之章門或至其家而後返旣而其父老子弟廻

惑展側思侯不休聚而謀于玉几山之校曰張
侯豈忘我耶其教令皆可爲後世法盍勒之以
示後之愛民者或曰張侯恂恂儒者所施行便
民然好自匿不喜有智勇之名刻教令非侯意
然則忘侯耶曰先王之經理其民也陳其國風
而通其慕好以知吏治侯治且成吾屬得而歌
舞之歌舞者吾人之情也懼于鄙野有一人焉

文之可乎或曰焉文之有能言者而可矣於是
問諸邑之賢良文學越五百里而贊以徵言于
予予豈能言者耶肅然爲起不獲辭進而問曰
張夢澤先生者非弱冠而以文章妙天下者耶
必若所云是子賤子奇復見于汝渝也予雖未
見張侯而聞于往來長者知其心試言所以治
渝者父老進曰侯亦非有驚詭繚厲賊絕之治

也要於便民渝貧閭于章虔歲賦當七萬餘而
所獲常不足以半賦或逋負至于十年有令悉
追之者侯至數月喟然而泣曰賦逋至十年藉
亦有不可得而校者矣此徒爲老胥史奸利地
何益下令課吾來渝以後者餘逋須後令民乃
無譁旁大縣或先一歲而畢徵或僅如其歲渝
不能也侯與民期以十且曰盡來歲春當竟也

民乃益舒矣訟以里老捕告者往往有之幾或
格不應侯召無不至者山谷之民見侯驚色喜
各自言其情無隱而侯以半詞決之皆解去侯
常推誠勸譬反覆至于父子骨肉之際未嘗不
流涕而遣之民以其風愧訟至于獄空囹圄所入
以廩饑民餘以待公所繕具諸生月三課以爲
殲錢至于侯自養粗厲取輿而已上計至無以

爲資都下呼爲窮新渝侯笑曰非新渝窮誰當窮者然渝乃更以侯重渝產銀中使橫且至侯意不爲屈欲引去大吏曰此非所望于賢者侯止爲盡一授中使前驅者織曲有程度有縣皆爲折衷以待中使知侯賢且事率整辦終不來渝也至虔還畧清江而下渝省費以千百計歲徵竭侯蹙然籲天曰礦稅爲寇天亦忘吾民耶

已而雨蓋自亥來三年邑無曉浸之憂野澗流
澚江楚行道無所稽夜戶不閉民樂而歌之亦
其時也予聞之駭然而興迨而嘆曰此盛德事
也而太平之業也吾何足以言之雖然如璧肉
好其精氣有異蓋周漢間所爲俗吏苦者固已
在包苴千牘之知筐篋簿書之能中乃以文學
相緣飾非其學也予聞之往來長者皆云侯性

澹而容端學深而行夷其爲政也惻乎所謂忠
信之美優游之法人知之不爲腴不知無以爲
瘠也由此言之侯意念深至類有道者夫有道
者其風澤自遠渝之不忘豈有極乎予能爲諸
父老子弟之不忘也而文以言曰蘭陵之英大
江之靈我侯誕生風霆角芒日月冰霜裂爲文
章經于有政文明以正惟所蒞幸古筠端聞南

爲渝川北倚蒙山侯以爲家廉貞惠和公勤靜
嘉言笑晷刻皆取成畫鮮不爲則不紆不綬函
良梔奸以敬其官如金如玉如布如粟如川如
谷耻幅其外以望其內如彼旌佩士女曰宜施
于道周或遊以歌汝簫汝醕式歌且舞無德與
汝豈無德與忘侯之處而思其去侯去在東衆
號而從孝慈則忠侯吉而駕將雨天下視渝其

稼渝人思止父也違止孰我儀止刊山以容瞰
虎盤龍維鼎維鍾我侯夢澤思也罔極視此樂
石

臨川縣孫驛丞去思碑

吳淞孫君耀祖來視臨川之孔渡驛三年遷嶺
南巡檢以去民畱之不可而思祠之祠之者賢
之也何賢乎孫君也君之賢有一時大吏所不

能辦者蓋先是驛在孔渡去郡五里逮金堤成
水趨文昌橋以北徙驛橋東歲甲午八月之二
日橋壞歲流殺人以百十數民議當修復此橋
而偶有一二氣力無識之人謂不可復不加徙
橋他所先太守張公以爲不然力復其十一之
四餘猶爲憤憤者破敗而不修戊戌予歸田始
著復橋三不難之議而署郡事二守朱公斷然

主之得詳兄以行顧下無和者君慨然起而任
之曰丞之驛與橋俱晝夜察其工便朱公大喜
曰丞能爾吾何憂已而梗者大起予與二三鄉
紳擇吉敦延郡縣告於河神一時長吏無敢出
者君曰丞業以任橋事神其聽予至期君銳然
朱衣攝祠事祭告訖風日清皎人用奮悅君嘗
捐十金犒匠氏然民愚觀望久莫爲應者予叔

尙恕謂予曰張太守時吾家修復四之二及茲
我嘗其功以民終其事可乎不然者負丞予遂
始其一而二三鄉紳繼之民見其因圯以立易
就各有所捐一歲而告竣壬寅之臘迎春於此
橋懽呼者萬計朱公屬民而嘆曰費出入有經
工早晚有程孫丞之力也橋成而謀所以屋之
仍以君旣厥事蓋今而後知君之賢然乃以遷

去不可得而用矣予閱史譏魏西門豹旁有漳
水而不能用爲不仁且不智夫彼猶水利可以
需而行此爲水害不可旦夕待可也歲溺數十
百人略無省憂豈彼獨去民遠孫君驛與橋近
時見溺者猶已溺動心與若然則孫君之仁也
孟子曰爲政不因不可爲智橋有因而可治其
功易成明甚乃獨一孫君早見而獨決與若然

則孫君之智也一二有氣力無知之人能撼大吏不能撼一丞豈大吏皆金注者怯與若然則孫君之勇也仁且智且勇有如孫君不止宰一驛而當大事爲世津梁豈可量耶爲大吏三五年偷以去固不如孫君力成一橋功德於民不朽予故因父老子弟之情而爲之言以告世之人爲民決計便利雖一事非仁智以勇不能官

雖卑亦能有所發憤張公朱公前後物故然皆
功德曾不可忘也

玉茗堂全集

臨川義仍湯顯祖著

文

爲士大夫喻東粵守令文

余觀東粵郡縣難爲甚於西粵蓋近寶而民多
奸吏易以富監司之地或廻遠察吏未精蓋余
始不得不稍近士大夫以論吏可信者十之七

文

九卷 一

焉若愈於同吏斯土者所是非焉何也余登名
以來年運而往矣今與余同事斯土者皆非余
故相朝夕者也直於禮數文移間模想而知其
監司於守令所在不能無昵而士大夫於守令
所在不能無怨怨不能有公猶昵不能無私也
故余參伍而用之此總吏治察人才之大較也
而日者守令輒持士大夫短長暗揭顯呈若惟

恐余與往來有所信用者此大不然余中州人也木強然無所諱而愛信士大夫與士大夫論吏未嘗過也無論見仕如周廣州啟祥周廉州宗武其人亦已久矣而士大夫至今傳其清魯司理黜董部丞志毅其官不復然矣而士大夫每見訟其清士大夫何負爾有司耶且聞有司中有謝絕士大夫偶爾相見若路人然者夫子

賤聖門年少之英其宰單父也滿車而載父老
曹參漢初更事之將其守齊郡也爲堂而師蓋
公爾等守令材於二君子耶余以爲雖夙智老
成於地方利害微渺變動有非書記所盡意知
所通者必于士大夫謀之士大夫之欺守令也
盡於其所關說之一事而已未有問其他事皆
欺者然則士大夫固可以源源而見其質勝者

愛而詢之以爲主其文勝者敬而詢之以爲輔
詩不云乎同爰咨詢每懷靡及周詢以盡衆也
今守令嘗自謂智力有餘可以獨見私決兼可
以籠制士大夫於是談笑恣意睚眦滯留賓主
無交利弊安訪必且訪之吏書而已門子而已
皂隸而已此數種人者最不利有司之聰明亦
最不喜士大夫之得近于有司也詩云其何能

淑載胥及溺其最可恨者庸吏爲人所使貪吏
先以箱人偏於士夫家深致其罪申詳體審乃
或不然不止教下民以不恭兼亦費上官之處
分與言至此爾守令等以爲何如然則士大夫
之家可無治乎曰士大夫亦所治者也奈何不
治當先之以禮耳夫士大夫固多賢豪知書卽
甚不自愛者其當官亦知有律令數條矣凡不

如律事未必其身爲之及其封君有少子者其子弟有奴客相誘者蓋利則平分于奴害則全歸于主理勢然也大奸惡自如律係治非大事係封君者宜姑以狀還示其封君曰人如此言未知信否善自治之夫封君固多老人習世變稚訥者也得此示當惶恐劬伏謝罪則禮之如初可也敬其父則子悅因以化其子也如封君

再犯其子仕在近宜爲書告之遠則告於羣士
大夫曰人言某封君再矣可若何三則係其放
治之矣如其子弟則召而教之在諸生者以付
學官未見其難爲也曰如士大夫身親里屠犯
法不義者知之何曰犯法大者如治廢人律其
次所以告語者如封君三則係治其奴四則係
治其子曰如斯而已乎曰有本子曰其身不正

如正人何誇石門之泉士大夫必不爭渡矣還
合浦之珠士大夫必不懷珠矣是故清吏之法
亦清濁吏之法亦濁清吏之法法身而濁吏之
法法人也且汝見食民脂膏爲天子待法然已
貪廢若此豈必士大夫言汝乎然則自爲清吏
而已無患士大夫不保汝矣曰如東粵海大夫
之節龐中丞之才亦可以治人矣所至不能大

治而常爲其部士大夫所危以去士大夫固有
必不可治者乎吾所云士大夫可治者乃東粵
非東吳也彼雖號難治然未嘗不敬服海公而
畏避龍公也二公雖去東吳之俗亦變又安在
東吳士大夫之難治也今以始從我東粵者宜
以改正身以禮先人興廢必詢衆心低昂必持
平法他日血食斯土循良有譜士大夫必不負

汝有言也竟無以疑忌禁制爲不可治之言而
士大夫雖於一二有司有所言余無戚心也如
陳郡丞鴻漸署新會閩余文書不行徐察其意
在便民也雅信之馮令渠治番禺每與論議常
左然知其志在古人也甚重之此二事皆汝守
令所見余豈以士大夫有言爲芥蒂不察其後
或各安乃心度乃職無貪無殘無昏無縱以

清漲海紆朝廷南顧之憂此論

爲守令喻東粵士大夫子弟文

東粵山海縣奧不可測所爲寶藏興焉貨財殖焉然近寶而反貧多藏厚亡天之道也惟粵中人材爲天地精寶萬有益于世而無一費於其鄉古遠無論陳湛二先生之正學梁方霍三公之偉業丘海二公之博文危節至于今粵之後

學未宜未嘗不謂之與古聖賢憂樂爭鋒而何
問今世哉而本院下車問俗問學乃稍有異有
云諸生得與有司過手通錢舉人輒遮有司車
言事麾之不去余喟然嘆曰嶺表多奇士何士
氣一至于此士大夫先達無能爲先耶旣而親
士大夫訪故實時務無不惻款周至大率以正
對者十之八以愛惡請者二事焉其一言故徐

聞令陸之貪其實廉而使酒不治事耳其二言
已降瓊賊李茂之可用不可殺夫茂于嘉隆之
際殺掠焚燒海上十餘年矣不克征而受降令
居城中其衆日寡他日有風塵之歛恐瓊州非
國家有也余是以違一二士大夫之教必禽之
其餘士大夫之教皆是也然則嶺海士風之敝
徒其下舉人諸生未有命教者耳其上大夫脩

各行不隊先達之風者固多余是以論吏舉事
未嘗不就士大夫也而傾者一二郡縣有所疑
云某鄉先生不能于其守若令因列其里居所
爲至云包舉蛋戶不如式船爲盜或出池盜珠
或受盜珠發覺反爲地者此自影響言之余不
忍謂士大夫有此至如云租渡船有等業對田
有爭領稅領鹽有爭則士大夫真有至本院言

之者其他舉債鎖人于柱笞沒之或創署年月
日爭買侵田宅空其價處不書買得多自填之
以絕其贖或與價十二三或以債相折或竟爲
奸人報怨受其所獻產不明者通告人買之展
轉取受竟決賣之少與獻者錢以來後奸或大
奴入市買物不售輒取物頓置道上破敗之詬
罵而去以此持小債不敢過士大夫之門郡縣

言往往如是一何市井鄙細人之甚也然此必
非士大夫所爲亦其家子弟貧薄失教無行義
一至此耳雖然子弟亦不可以無教也禮于父
母幾諫得罪于鄉黨州閭寧熟諫三則涕泣而
隨之況于子弟父兄乃得而義方之者乎夫士
大夫子弟猶吾子弟也余不明于義方亦有一
得之勸可乎夫士大夫子弟固有舉于鄉者矣

賓興之詩曰示民不佻君子是則是傲言爲鄉
所舉者爲王嘉賓民之望也如復輕佻暴亂卽
與細民何異甚則有細民自愛所不爲者以此
稱嘉賓不已羞乎于是鄉中細民得而輕之矣
況在有司復安所見重而相賓禮乎蓋知汝鄉
行如此智量福業可知他日受官或值此有司
同事詎復以可人相待乎試觀士大夫享長福

者其心必有以愛人其行必有以重于世亦有
褊心薄行而類通顯者然其名必壞其後亦多
不全寧爲彼不爲此也陳江門海忠介亦何必
成進士乎其號爲秀才者于編民中才且秀也
如已不才于父母之邦其亦不秀甚矣夫以巾
帶之士加以各家如肯圻節好義其名易出于
平人而乃于鄉閭中無所比數如此深爲惜之

至于士大夫子弟有同爲白民而侮奪鄉閭者
不勝則忿曰必欲假一巾帶而後可嗟夫再世
之後編氓一也汝今日無奈人何人他日亦無
奈汝何矣然則勢力不行正爲佳事不足忿也
孔子曰君子懷德小人懷土君子懷刑小人懷
惠以近事相辟如忠孝慈讓皆所謂德也宗黨
善之州閭幸之天下後世聞者莫不歎慕之可

謂至榮此君子所懷卽君子之士也小人務廣
田宅而已田宅亦土也然君子以德爲土萬世
居之小人以土爲土沒世而復陵替于他人故
懷土不如懷德之寧也刑者如今日陳說律令
以儆聳爾等是也當以此爲懷見幾而遠罪若
我等官司聽汝說事害人名雖爲惠實汝毒也
小人無知喜順而惡逆故懷惠而忘刑已而涉

于刑或免冠乞哀或褫服受係舉人秀才賢公
子不爲而爲堦前獄內之人哉玉杯盛溲此之
謂也雖然豈能無触于士大夫乎父兄子弟之
師也士大夫爭渡爭葑其子弟有不爭者乎士
大夫領稅領鹽其子弟有不領者乎士大夫宰
鄉閭不德其子弟必不懷德矣士大夫僭官府
行刑其子弟必不懷刑矣乞人臧婦苟愛其子

未有教其各以暴者也以一二士大夫所爲令子弟效之敗名滅種此何異憂子弟之饑而食之以毒藥乎子曰吾未見過而內自訟者卽士大夫有一二過舉者慊然謂其子弟曰吾今日以往多非人所爲汝等良子弟慎毋效之惟孝友慈讓是爲爭渡船不如漁者之讓坻也爭蒔田不如耕者之讓畔也領稅領鹽不如領詩書

仁義之爲富也使鄉里稱爲小人不如使鄉里
稱爲君子使他日稱爲惡種不如使他日稱爲
善門如此雖陳湛梁方諸公之訓子亦何以遠
過于斯乎詩不云神之聽之終和且平本院之
言神之所聽也此諭

續棲賢蓮社求友文

歲之與我甲寅者再矣吾猶在此爲情作使劬

於伎劇爲情轉易信於疾癰時自悲憫而力不
能去嗟夫想明斯聰情幽斯鈍情多想少流入
非類吾行於世其於情也不爲不多矣其於想
也則不可謂少矣隨順而入將何及乎應須絕
想人間澄情覺路非西方蓮社莫吾與歸矣昔
遠公之契劉遺民等十八賢爲上首而康樂高
才求與不許淵明嗜酒而更邀上名跡旣遷勝

事遂遠至趙宋省常昭慶之社廬有向王二相
國名隱跡不著亦足致慨於出世之難矣吾弱
冠徘徊墜簪池上因而自念異日投簪庶其在
此四紀而餘因循未果適欲奮飛開蓮續社而
故林馳傳頗礙棲遲諸所高深去人太遠津梁
一處允惟厥中則有唐少室山人李公所隱棲
賢故基谷林石淙雷動車震橋名三噴循涯眺

聽空寒應心五老雙流傾其左側龍淵鹿洞吸
其近間真不盡之靈墟而無爲之盡境也中有
平疇煖曲茶筍斯儲谷口江乘延接非遠興言
葺築無負初懷冬春間復聞九江分司錢塘葛
公加意道業亟遣依之異成斯事比度章門葛
公幅巾歸越而棲賢老釋樂愚寔來樂愚故有
淨行可語者旋告之故樂愚曰亦其時也高天

銷於熾炭大地沉於積流况此聚沫之軀懸輿
之魁乎雖然非有同心安能久處曷若遂蹤林
遠大啟宗雷庶使鸞鶴相依蘭菊無絕耳吾愧
其言自惟素尚淺於淵明襟心廣於康樂而敢
擅嗣盟以滓前哲已而靜思有足述者晉宋之
間世道奇側遠公夷迹諦交實深玄慮我明一
家恢然道廣才度之士朝摯交容慕賴以悲感

懺懺要亦語嘿之通懷邈來之大致矣且吾
有二友湯嘉賓久懺嘆於棲賢岳潛初近勤施
於昭昭之續斯盟也成斯役也二公首其許
我乎嗟夫匡蠡之名迹鉅矣宇宙之名流盛矣
遺民通隱必有周劉散騎舍人未乏詮炳費神
明於匪妙委日用於無常情有所必窮想有所
必至苟懷千秋之寄者皆將有感於斯言耳

玉茗堂全集